



Il plan cun las surfatschas adattadas per cultivar ers elavurada dal chantun Grischun en igl intschess da la Foppa. La piazza da golf da Sagogn è part dal plan, i pudess dentant cuzzar in amen enfin che graun crescha sin quella piazza.

CHARTA CHANTUN GRISCHUN

Dapli graun e damain biestga

Pervia da la guerra en l'Ucraina creschan ils pretschs per granezza. Medemamain crescha la discussiun en Svizra co augmentar l'agen provediment. Dapli graun sa lascha era producir en il chantun Grischun, dentant betg a curta vista.

ANDREAS CADONAU/FMR

En l'Ucraina zappitschan ils panzers la proxima raccolta e la Russia ha para annunzià da desister dad exportar granezza. Enfin 30% da l'entira raccolta da graun che vegn exportada deriva da quels dus pajais, uschia ch'ils pretschs per graun ch'èn gia auts creschan vinavant. E quels pretschs chars na pon betg tut ils pajais pajar, la populaziun povra croda en pitgiras. Era la Svizra importescha bler graun per il nutriment uman e per la biestga. Pretschs pli chars per mangiativas èn era tar nus in tema. Da la vart da la PPS svizra è vegnì il clom per in proxim Plan Wahlen. Il plan numnà tenor ses inventader Traugott Wahlen aveva stgaffi las premissas per augmentar l'agen provediment da la Svizra durant la Segunda Guerra mundiala.

Graun prosperescha en il Grischun

Da las discussiuns e pretensiuns actualas da producir dapli graun en Svizra ha udi era il schef da la cussegliaziun purila al Plantahof, *Batist Spinatsch*: «Igl è pussaivel da plantar dapli granezza en il chantun Grischun.» Il terren ed il clima lubeschan senz'auter d'extender la produenziun. Ils ers grischuns percunter èn bunamain svanids suenter la Segunda Guerra mundiala, «per gronda part pervia dals pretschs bass.» Ed enstagl da plantar furment, seghel ni avaina han ils purs plantà tirc per pavlar la biestga. L'idea che vegn discutada actualmain da reducir la biestga ed arar dapli è tenor Batist Spinatsch: «Betg dal tutfatg fallada.» Era pervia da la protecziun dal clima, sco quai ch'il manader da la cussegliaziun purila di. Biestga che furnescha il cultim per engraschar ils ers dovria dentant vinavant.

«Adattar la produenziun agrara na san ins betg sco da volver ina clavella.»

Batist Spinatsch, cussegliader da purs al Plantahof

«Uschiglio ston ils cultivaders engraschar ils ers cun cultim artificial.» Ed ils pretschs per quest cultim creschan medemamain, era pervia dal gas duvrà per producir nitrogen, in dals principals cultims artificiali. «Sulet cun agid dal sulegl e da la plievgia na po il graun betg prosperar, era betg en las valladas grischunas.»

Gran Alpin cun esperienza

Blera experienscha da cultivar graun han las puras ed ils purs da la societad Gran Alpin. *Aldo Arpagaus* da Cumbel presidescha la societad fundada avant prest 40 onns. «Actualmain cultiveschan ils producents da Gran Alpin strusch 800 hectaras en las zonas da muntogna grischunas.» Tenor las explicaziuns dal president da Gran Alpin è la surfatscha sa dublegiada ils davos diesch onns, era perquai che la Confederaziun promovia la cultivaziun dad ers en la muntogna. Ils producents da Gran

Alpin desistan da cultim artificial e da proteger las plantas cun meds sintetics. «Tranter 500 e 700 tonnas graun da differenta sort raccoltan ils purs da Gran Alpin onn per onn.» La raccolta variescha fitg tenor l'aura. En la Tumleastga pon ils purs da Gran Alpin raccoltar enfin 50 kilos graun per ara. «En Lumnezia èn 30 kilos per ara in buna raccolta e quai che surpasa quels 30 kilos è ina fitg buna raccolta.» Manaschis convenziunals che dovran cultim artificial pon raccoltar dapli, principalmain en la Bassa. Aldo Arpagaus manegia che la cultivaziun dad ers possia sa mesurar economicamain cun la tratga da biestga. «Ils animals en uigl èn a blers purs pli datiers che l'er.» Dals pretschs da graun che creschan pervia da la guerra en l'Ucraina ha Aldo Arpagaus intervegnì. «Sch'ils purs vulan arar dapli ston els decider quai uss.» Batist Spinatsch avvertescha medemamain: «Adattar la produenziun agrara na san ins betg sco da volver ina clavella.»

In nov Plan Wahlen

In plan per temps pli stgars ha la Confederaziun cun il cataster per surfatschas adattadas per arar. In plan che duai proteger las bunas surfatschas agraras en Svizra. Tenor quel plan ha il chantun Grischun definì las surfatschas grischunas adattadas per cultivar ers, en tut 6300 hectaras. Regularmain ha la politica ubain la publicitad discutà ch'i saja necessari da proteger las surfatschas adattadas per cultivar. Tuttina è blera da quella surfatscha vegnida unfrida per vias, zonas da commerzi e da construcziun ed auter. Dura la guerra en l'Ucraina pli ditg pudess l'enconuschientscha crescer che las mangiativas da mintgadi sin il taglier ston era crescer insanua.



Cultivar ers ha in lunga tradiziun en l'intschess alpin. La foto mussa duas dunnas che raccoltan graun a Schlarigna sin passa 1700 meters sur mar.

FOTO MAD/SELINA AEBLI